

REGIONAL NEWS

HEADLINES:

1. Aizawl Municipal Corporation inthlan vote thlak ni vawiin khan boruak muanawm tak hnuaiah mipui ten vote an thlak a, tlai dar 5-ah polling station tam zawk khar a ni.
2. Gauhati High Court in Assam Rifles hmun hluia thing te chu thuleh awm hma chu kit rih lo turin sorkar a hriattir.
3. Bilkhawthlir Chemphaia loneitute Hawite thar chhuah Kg 2154 hralh chhuah a ni.
4. West Bengal Assembly inthlan thawh khatna leh Tamil Nadu Assembly inthlan neih tur atana campaign theih hun, vawiin tlai khan a tawp a, naktipah vote thlak a ni ang.

<><><>

AMC POLLING

Aizawl Municipal Corporation inthlan vote thlak ni vawiin khan boruak muanawm tak hnuaiah mipui ten vote an thlak a, tlai dar 5-ah polling station tam zawkin an khar thei a ni.

Vawiina vote thlak zingah Chief Minister Pu Lalduhoma, Home Minister Pu K Sapdanga, Leader of Opposition Pu Lalchhandama, MNF President Pu Zoramthanga, MPCC President Pu Lal Thanzara, MPCC President Kalchhuak, Pu Lal Thanhawla, BJP State President Dr K Beichhua leh minister leh MLA thahnem tak an thawkchhuak a ni.

AMC inthlan ah hian rorel lai ZPM, bakah MNF leh MPCC te chuan ward 19 an chuh kim vek a. BJP chuan bial 11-ah candidate an nei a. Independent candidate an awm lo a ni. AMC bial/ard 19 zinga 6 chu hmeichhe tan chauha chuh theih tura ruat ni mah se, tu pawhin a chuh theih bialah hmeichhe candidate 7 an awm a, ZPM leh MPCC hmeichhe candidate 3-te'n tu pawhina chuh theih bial an chuh a, MNF hmeichhe candidate pakhatin a chuh bawk. Tun tum AMC inthlan chuhtu mi 68 zinga 28 te chu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.

ZPM Leader, Chief Minister Pu Lalduhoma'n Aizawl Municipal Corporation ah ZPM chuan sawrkarna an siam ngei a beisei tih kan corren an inkawmnaah a sawi a, thlan tlin an nih chuan langtlang sawrkar din an tum dawn a ti.

Chief Minister hian vawiin khan Chawlhhmun Polling station ah vote thlakin hemi hnua thutharthehdarhtuten an kawmna ah tunhnaia ZPM Party beihna hrang hrang an tawh chu an party thatna vek tur anih thu a sawi a, ZPM an sawrkar chuan Aizawl khawpuiin hma a sawn phah a beisei tih sawiin AMC tha zawk chu an intiamna a nih thu a sawi.

Pu Lalduhoma chuan state sawrkar leh Municipal chu thawhho ngai anih avangin inlungual taka an awm a ngai a ti a, kawng tam taka hmasawna turah thawh dun a ngaih avangin ZPM sawrkar ngei a ngaih thu a sawi a, Opposition lamin sawrkar an thlawp that tawk loh thin avangin Ruling lai thlan tlin mai chu hmasawna tha zawk leh awlsam zawk anih thu a sawi a ni.

MNF President Pu Zoramthanga'n AMC inthlana an party aiawh tur te chu an tha tawk tih sawiin MNF Candidate that ber tum anih thu a sawi.

Akashvani corr nen an inkawmna ah he thu hi sawiin Pu Zoramthanga chuan AMC inthlanah an Party candidate te an ring tawk tih sawiin inthlan dang nena tehkhinin MNF Candidate neih that ber tum ani a ti a, beiseina sang tak an neih thu a sawi.

Pu Zoramthanga chuan an elpui lian ber chu ZPM anni a ti a, Congress chuan seat tam an lak a rin loh thu a sawi a, Ward hrang hrangah ZPM nena inbei ber tur annih thu a sawi a ni.

MPCC President Pu Lal Thanzara chuan Aizawl Municipal inthlan chuh tura candidate zingah Congress candidate te chu mimal thlira tha ber anni a ti bawk a.

Akashvani corr Isaac Zoramsanga zawhna chhangin Pu Lal Thanzara chuan Candidate hrang hrang zingah Congress candidate chu party anga thlir loh chuan Ward chungah tha ber te an ni hlawm vek a ti a, khawtlanga mi chhuanawm tak tak anni tih sawiin Candidate an neih that ber thu a sawi a ni.

Pu Lal Thanzara chuan an khingpui lian ber chu ZPM anni tih sawiin MNF nen chuan intiat tawk velah an inngai a ti a, ZPM chu state ah rorel lai party an nih avangin candidate an tling tam thei a ti a, Congress chu AMC ah sawrkarna siam zo lovin awm mahse an party chuan san lam an pan zel tho tih sawiin dinchhuah hun an la nei ngei dawn a ti a, State sawrkar ZPM kaihhruai leh AMC-a sawrkar MNF Party te chu mipui tana hna an thawh that tawk loh avangin Congress candidate te tan kawng nasa takin a inhawng tih a sawi.

BJP President Dr K Beichhua an Mizoramah BJP Party in hma a sawn zel tih sawiin thalaiten a BJP hlutna an hre chho mek a ti a.

Akashvani corr zawhna chhangin Dr K. Beichhua chuan State pum thlirin BJP Party chuan hma a sawn zel tih sawiin thalaiten an bawh chho zel a ti a, tual to party ringawta inngah that loh zia mipuiin an hre chho mek tih sawiin National Party lian duh tu an tam chho zel a ti a, BJP ah hmasawna lian zawk a awm thei tih chu mipuite pawm dan ani chho zel tih sawiin kawng hrang hrangah party in hma an sawn thu a sawi a ni.

BJP President chuan AMC beiseina an nei sanglo tih sawiin sawrkar tha tak erawh a pian ngei a beisei a ti a, BJP chu hmasawn zel mahse Aizawl mipuite an an la tlak nat tawk loh avangin AMC inthlanah an beiseina a sang lutuk lo tih a sawi.

Vawiina Vote thlak tura kal MPCC President hlui, Pu Lal Thanhawla chuan kan corr zawhna chhangin, politics khawvelah dikna in hmun chang se a tlo ber a ti a ni.

<><><>

AMC POLLING DAY

Aizawl Municipal Corporation inthlanpui vote thlak mekah tun dinhmunah vote zaa 59.78 a tla niin State Election Commission chuan a chhinchhiah a, vote thlak mek an la awm avang leh result dawn belh zel anih avangin vote tla zat hi a danglam chho zel tura ngaih a ni.

AMC inthlanna ah hian ward 19 awmin, polling station 264 a awm a, vote thlak theih hun chung hi zing dar 7 atanga tanin tlai dar 5 thleng hawn a ni ang.

AMC inthlanna tura vote nei awm zat chu hmeichhia nuai 1, sing 2, sang 9 leh 656 leh mipa nuai 1, sing 1 leh 333 an ni a, an vaiin vote nei hi mi nuai 2, sing 3, sang 9 leh 989 an awm a, mipa ai hmeichhia an tamna chu 19,323 a ni. Vote awm tamna ber chu ward 18-na niin, vote 18,906 an awm a. A tlemna ber ward 8-na-ah vote nei mi 7,975 an awm thung. AMC

huam chhungah hian hian a veng bil ang a vote tamna ber chu ward number 2-na huam chhunga Bawngkawn Veng a ni a, vote 6,442 an awm a ni.

Tun tum hi AMC inthlan buatsaih vawi 4-na tur a ni a, AMC hnuaiah hian Ward 19 awmin, heta tanga Ward 6 (paruk) hi hmeichhe tana reserved a ni a, Local council 89 leh Polling Station 264 a awm mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

HIGH COURT STAYS FELLING OF TREES

Gauhati High Court in Assam Rifles hmun hluia thing te chu thuleh awm hma chu kit rih lo turin sorkar a hriattir.

Centre for Environment and Social Justice (CESJ) aiawhin Saizampuii Sailo chuan tunhnaia Mizoram sorkarin Bazar Bungkawn atanga Treasury Square inkar kawngpui metre 14 thlenga zauhna atana Assam Rifles hmun hluia thingkung a kih chungchangah Public Interest Litigation (PIL) a theh lut a, a petition thehluhah chuan chanchinbu thenkhat ziah dan behchhanin, AR hmun hluiah hian thing 400 chuang a awm a ti a. Thingkung tam zawk te chu kum 100 vel a upa an ni a, thenkhat pheih chu kum 1850 vela phun tawh te a ni tih sawiin, thingkung 174 chu kih tura tih an nih thu a sawi a. Aizawl khawpui tan an tangkai avangin sawrkar chuan an kih chhan a sawifiah tawk lova, Aizawl khawpui tan a tha dawn lo nia a ngaih thu a sawi bawka ni.

He PIL chungchangah hian Gauhati High Court chuan nimin khan thuchhuah siamin, Assam Rifles hmun hluia thing kih chu thuleh awm hma chu titawp lailawk turin sorkar a hriattir a. Hmala chhunzawm zel tur hian thingkung kit tur hian insawifiahna mumal tak a ngai tih sawiin, thlaleh May ni 18-ah hemi chungchang hi a ngaihtuah leh dawn a ni.

Karkalta Nilaini atang khan Mizoram sorkar chuan kawngpui laih zauna atan Lammual chhehvel kawngpui hnaia ding thingkung engemaw zat a kit tan a, he hmalakna hi environment humhalh pawl CESJ chuan dodalin, thingkit tura sorkarin a rawihte an dang a, hemi hnu hian CESJ leh sorkar thuneitute chu inbiain, thingkih chu an chawlhsan lailawk dawn thu leh, thing kih tur zat ennawn a nih tur thi an an sawi avangin CESJ chuan karkalta Zirtawpni khan thingkih dodalna hi an titawp a. Hemi hun chung vek hian High Court ah PIL chu theh lutin, Justice Michael Zothankhuma leh Justice Kaushik Goswami te thutna Division Bench chuan thu ngaihtuah tlakah a pawm a, sorkar pawh an hmalakna titawp lailawk turin a hrih a ni.

Maremi CORR

<><><>

HAWITE HARVEST

Bilkhawthlir Block Agriculture Dept leh Farmer Producer Organisation (FPO), Bilkhawthlir te tangkawp chuan vawiin khan Bilkhawthlir Chemphaia loneitu mi 26 te hnen atangin Hawite an thar chhuah Kg 2154 an lei sak.

Niger (hawite) hi Kg ah Rs. 80/- in an lei sak a, Hawite hriak hi chawhmeh kannna atana hman, hriak hrisel tak a ni. Hawite chi hi FPO, Bilkhawthlir te chuan khawl ah herin litre ah cheng 350 in an hralh thin a ni.

Kumin February atanga FPO in Hawite hriak an hralh tawh zat chu litre 325 a ni a, Hriak ei chi a intodelh hi sorkar laipui hmalakna anih avangin sorkar pawhin a ngai pawimawh hle a ni.

<><><>

ELECTIONEERING

West Bengal Assembly inthlan thawh khatna leh Tamil Nadu Assembly inthlan neih tur atana campaign theih hun, vawiin tlai khan a tawp a, naktipah vote thlak a ni ang.

Campaign theih hun tawp dawn thlengin party tinte, thahnemngai takin an campaign a, Union Minister Piyush Goyal-a chu vawiin khan Tamil Nadu-ah a campaign a, NDA-in hneh takin hnehna an chang dawn niin a sawi a ni. Tamil Nadu-ah hian tangrual pawl NDA leh Secular Progressive Alliance-te inbei ber tura ngaih a ni a, NDA-ah hian AIADMK bakah party lian 4 leh party tenau 16 an tel a, Secular Progressive Alliance-ah party 16 an tel a ni.

Hetih lai hian, Union Home Minister, Amit Shah chuan vawiin khan West Bengal tlawhin Kulti-a vantlang inkhawmah thu a sawi a, Mamata Banerjee kaihhruai Trinamool Cong sorkar chu nasa takin a sawisel a ni. West Bengal inthlan thawh khatnaah hian assembly bial 152-ah vote thlak a ni ang.

<><><>